

(„Službene novine Federacije BiH“, br. 20/08)

Na osnovu člana 39. Zakona o zaštiti stanovništva od zaraznih bolesti ("Službene novine Federacije BiH", broj 29/05), federalni ministar zdravstva, donosi

PRAVILNIK

O NAČINU OBAVLJANJA ZDRAVSTVENIH PREGLEDA OSOBA POD ZDRAVSTVENIM NADZOROM

Član 1.

Ovim pravilnikom se propisuje način obavljanja zdravstvenih pregleda osoba koje su, na osnovu člana 30. Zakona o zaštiti stanovništva od zaraznih bolesti ("Službene novine Federacije BiH", broj 29/05), stavljene pod zdravstveni nadzor.

Član 2.

Zdravstveni pregled osoba koje obavljaju poslove u proizvodnji ili prometu namirnica, odnosno snabdijevanju stanovništva pitkom vodom, a koje na svojim radnim mjestima dolaze u dodir s namirnicama odnosno s pitkom vodom, obuhvaća:

1. prije zasnivanja radnog odnosa:

- liječnički pregled na zarazne bolesti koje se mogu prenositi namirnicama odnosno pitkom vodom i na gnojna oboljenja;
- uzimanje materijala i bakteriološki pregled brisa grla i nosa na piogeni stafilokok i betahemolitički streptokok grupe A (kliconoštvu);
- uzimanje materijala i bakteriološki pregled stolice na salmonela i šigele (kliconoštvu);
- uzimanje materijala i laboratorijski pregled stolice na crijevne parazite (parazitonoštvo),
- rendgensko snimanje pluća, ako se na osnovu liječničkog pregleda ili epidemiološke indikacije posumnja na tuberkulozu pluća.

2. zdravstveni pregled u toku zaposlenja:

- jedanput godišnje pregled iz stava 1. tačka 1. alineja 1. i 5. ovog člana,
- svakih šest mjeseci pregled iz stava 1. tačka 1. alineja 2., 3. i 4. ovog člana.

Član 3.

U slučaju pojave trovanja hranom za koje je utvrđeno ili se sumnja da je izazvano stafilokokom koji luči enterotoksin, obavljat će se pregled materijala uzetog sa sluznice nosa i grla, odnosno s promjena na koži kod osoba zaposlenih u proizvodnji ili prometu mlijeka i mliječnih proizvoda, sladoleda i drugih slastičarskih proizvoda kao i na pripremanju hrane u kuhinjama, nezavisno o zdravstvenom pregledu iz člana 2. ovog pravilnika, a na prijedlog nadležnog sanitarno - zdravstvenog inspektora, epidemiologa odnosno liječnika koji provodi protuepidemijsko- epidemiološko ispitivanje.

Član 4.

Zdravstveni pregled osoba koje obavljaju poslove u obrazovnim i drugim ustanovama za djecu i omladinu, obuhvaća:

1. liječnički pregled na tuberkulozu pluća,

2. rendgensko snimanje pluća ako se na temelju liječničkog pregleda ili epidemiološke indikacije posumnja na tuberkulozu pluća.

Zdravstveni pregled osoba zaposlenih u ustanovama za smještaj djece na poslovima njege i odgoja - predškolskim ustanovama (jaslice i dječji vrtići), osim pregleda iz stava 1. ovog člana obuhvaća i:

1. uzimanje i pregled brisa nosa i grla na betahemolitički streptokok grupe A,
2. uzimanje i pregled stolice na salmonele, šigele, enterotropne Escherichia coli i crijevne parazite

Zdravstveni pregled osoba iz st. 1. i 2. ovog člana, obavlja se prije zasnivanja radnog odnosa - zaključenja ugovora o radu i jedanput godišnje tokom zaposlenja.

Član 5.

U slučaju pojave streptokoknih i meningokoknih oboljenja u ustanovama za smještaj djece i omladine, obavljat će se pregled materijala uzetog sa sluznice nosa i grla osoba zaposlenih u tim ustanovama nezavisno o zdravstvenom pregledu iz člana 4. ovog Pravilnika.

Član 6.

Zdravstveni pregled zdravstvenih radnika koji obavljaju poslove zdravstvene zaštite u zdravstvenim ustanovama i u privatnoj praksi, te osoba koje se u zdravstvenim ustanovama i socijalnim ustanovama (uključivo i učenike i studente za vrijeme edukacije) bave pregledima, liječenjem, njegom i usluživanjem bolesnika, kao i osoba koje rade u proizvodnji, opremanju i izdavanju lijekova, odnosno na drugi način dolaze u neposredan dodir s lijekovima, obuhvaća:

1. liječnički pregled na tuberkulozu pluća,
2. rendgensko snimanje pluća, ako se na osnovu liječničkog pregleda ili epidemiološke indikacije posumnja na tuberkulozu pluća,
3. uzimanje te pregled brisa nosa i grla na piogeni stafilokok i betahemolitički streptokok grupe A;

Zdravstveni pregled osoba koje rade na porođajnim i dječjim odjelima zdravstvenih ustanova obuhvaća, osim pregleda iz stava 1. ovog člana i uzimanje te pregled stolice na salmonele, šigele, enterotropne Escherichia coli i crijevne parazite.

Zdravstveni pregled iz st. 1. i 2. ovog člana, obavlja se prije zasnivanja radnog odnosa i jedanput godišnje tokom zaposlenja.

Član 7.

Zdravstveni pregled osoba koje se u privrednim društvima i drugim pravnim osobama, odnosno samostalno ličnim radom bave pružanjem higijenske njege stanovništvu, kao i osoba koje rade u proizvodnji ili prometu sredstava za higijenske potrebe stanovništva, obuhvaća:

1. liječnički pregled na tuberkulozu pluća,
2. rendgensko snimanje pluća ako se na osnovu liječničkog pregleda ili epidemiološke indikacije posumnja na tuberkulozu pluća,
3. uzimanje i pregled brisa nosa i grla na betahemolitički streptokok grupe A i piogeni stafilokok,
4. uzimanje i pregled stolice na salmonele i šigele.

Zdravstveni pregled iz stava 1. ovoga člana, obavlja se prije zasnivanja radnog odnosa i jedanput godišnje tokom zaposlenja.

Član 8.

Kontrolni pregled osoba - nosioca salmonelle i šigele vrši se počev od šestog dana od dana završene terapije, uzastopnim trodnevnom bakteriološkim pregledom stolice.

Kontrolni pregled osoba - nosioca crijevnih protozoa (*Lamblija intestinalis*, *Entamoeba histolytica*) vrši se počev od osmog dana od dana završene terapije, uzastopnom trodnevnom kontrolom stolice dobivene provokacijom.

Kontrolni pregled osoba - nosioca piogenog stafilokoka, vrši se počev od trećeg dana od dana završene terapije, uzastopnom dvodnevnom kontrolom brisa grla i nosa.

Član 9.

Zdravstveni pregled osoba koje u Federaciju Bosne i Hercegovine dolaze iz zemalja u kojima ima:

1. MALARIJE - obuhvaća: praćenje temperature, uzimanje i pregled krvi na uzročnike malarije, unutar 5 dana od dolaska,
2. KOLERE - obuhvaća: uzimanje i pregled stolice na uzročnike kolere unutar 5 dana od dolaska,
3. SARS-a - obuhvaća: praćenje temperature i respiratornih simptoma unutar 10 dana od dana dolaska,
4. ŽUTE GROZNICE - obuhvaća: šestodnevni zdravstveni nadzor, ako nisu cijepljeni,
5. PLUĆNE KUGE - obuhvaća: zdravstveni nadzor unutar 5 dana od dolaska - pregled biološkog materijala (ispljuvka),
6. HEMORAGIJSKIH GROZNICA (Ebola, Lassa, Merburg) - obuhvaća: zdravstveni nadzor u trajanju najduže inkubacije, mjerenje temperature, uzimanje biološkog materijala na analizu.

Zdravstveni pregled iz stava 1. ovog člana obavlja se pri ulasku u Federaciju Bosne i Hercegovine, i njegov sadržaj i obim se ažurira prema važećim algoritmima (evidence based medicine).

Član 10.

Zdravstvene preglede osoba koje podliježu zdravstvenom nadzoru prije zasnivanja radnog odnosa - zaključenja ugovora o radu i tokom zaposlenja, obavljaju zdravstvene ustanove koje imaju organiziranu higijensko-epidemiološku službu.

Član 11.

Rezultati zdravstvenih pregleda osoba koje podliježu zdravstvenom nadzoru, izuzev osoba iz člana 8. ovog pravilnika, upisuju se u sanitarnu legitimaciju, prema obrascu koji je odštampan uz ovaj pravilnik i njegov je sastavni dio.

Sanitarna legitimacija deponira se kod pravne odnosno fizičke osobe kod koje je pregledana osoba zaposlena.

Član 12.

Danom stupanja na snagu ovog pravilnika prestaje važnost propisa o načinu obavljanja zdravstvenih pregleda osoba pod zdravstvenim nadzorom, koji su se primjenjivali na teritoriji Federacije Bosne i Hercegovine do dana njegovog stupanja na snagu.

Član 13.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

Broj 01-37-2968/08
8. aprila 2008. godine
Sarajevo

Ministar
prim. dr. **Safet Omerović**, s. r.

Prva stranica Veličina 10x15cm

**SANITARNA
LEGITIMACIJA**

Druga stranica **Prilog 1.**

SANITARNA LEGITIMACIJA

Registarski broj
legitimacije _____

Mjesto i
datum izdavanja _____

MP

Potpis doktora specijaliste

Treća stranica

PODACI O PREGLEDANOJ OSOBI

IME _____

PREZIME _____

Mjesto i datum
rođenja _____

JMBG _____

Broj lične karte i mjesto
izdavanja _____

Četvrta i daljnje / od 4.-14./ stranice

Red. broj	Zdrav. ustanova koja je obavila pregled	Broj ambul. dnevnika	Nalaz
1	Tuberkuloza		
2	Crijevne bol.		
3	Parazitarne bol.		
4	Ostale zar.bol.		
5	Kliconoštvo		

Na osnovu obavljenih zdravstvenih pregleda utvrđeno je da _____ boluje-ne boluje i da izlučuje- ne izlučuje klice zaraznih bolesti određenih člankom 8.Zakona o zaštiti stanovništva od zaraznih bolesti ("Službene novine Federacije BiH", broj:29/05).S obzirom na navedeno, pregledana soba ispunjava uvjete za rad.

Mjesto i datum
pegleda _____ MP potpis dr.med.spec